

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

16 Février 2018

(29 Jamad'ul Awwal 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Statut Papa-Garçon ».

LE STATUT D'ENE PAPA

Le Saint Prophète Muhammad (saws) li le modèle parfait pour l'univers. Li ti vini dans ene l'époque kot bane dimounes ti barbares et pas ti ena aucaine respect pour bane relations familiales. Pour aujourd'hui, mo fine choisir pou cause avec zot lor l'importance ki li fine apporter à statut d'ene papa.

Le bon caractère, le bon comportement et le bon conseil zot bane qualités ki faire plaisir au Créateur. D'après ene Hadith, le Saint Prophète (saws) fine dire ki celui ki faire plaisir à so papa, sa faire Allah plaisir. Quand ene papa (ki suivre *Shariah*) li content, sa faire le Créateur (nous Allah) plaisir. Par contre, si papa là pas content, sa pas faire ditout plaisir à Allah (twa). Sa c'est le statut ki fine accordé à sak papa. Si ene tel statut fine accordé à (sakaine d'entre nous) nous papa, alors mazerin alors ki statut fine accorder à papa du Saint Prophète (saws), Hazrat Abdullah (ra)?

Papa biologique du Saint Prophète (saws), Hazrat Abdullah (ra) ti quitte sa lé monde là (c'est-à-dire, li fine mort) avant même naissance du Saint Prophète (saws). Allah (twa) fine oulé ki le Saint Prophète (saws) vine ene modèle pour bane croyants sous tous bane l'angles, et dans tous bane l'aspé. Malgré le fait ki le Messenger d'Allah (saws) pas fine trouve so papa biologique, Allah, nous Créateur, fine accorde li ene papa adoptif ki ena le même droit ki ene vrai papa. Le Saint Prophète (saws) ti content li d'ene très grand l'amour et fine accorde li ene grand l'accueil et l'honneur, de sorte ki li fine tire so papa adoptif dépi l'obscurité pour guide li vers la lumière et comme récompense papa là pou dans paradis.

Le papa adoptif du Saint Prophète (saws) Hazrat Harith (ra) ti alle rende li visite dans Makkah, après la révélation du Quran Shareef. Quand zot fine trouve Hazrat Harith (ra), bane Quraishs ki ti infidèles (*Kâfir*) fine informe li ki so garçon fine dire ki après la vie lor la terre, pou ena ene l'autre la vie, et ki à la suite du dernier jugement (le Jour du Jugement dernier), bane actions de sak dimoune pou conduire zot soit dans paradis soit dans l'enfer. Bane bons croyants pou dans royaume du Créateur, tandis ki bane infidèles pou pousser dans difé. D'après zot, l'effet de propagation de so message fine casse zot (c'est-à-dire, bane Quraishs zot) l'unité.

Hazrat Harith (ra) à sa l'époque là pas ti encore embrasse l'Islam. Après so rencontre avec bane Quraishs, li fine alle guette le Saint Prophète (saws) pour mette li à so service. La façon ki le Saint Prophète (saws) fine accueillir so papa adoptif, d'ene si grand courtoisie ti exemplaire. Hazrat Harith (ra) fine raconte le Saint Prophète (saws) saki bane Quraishs fine dire li au sujet de l'autre la vie après la mort et de cassure de zot l'unité. La réponse du Saint Prophète (saws) en ene sel phrase même fine ena tellement ene si grand l'effet lor Hazrat Harith (ra) ki sa fine pénétré so lé cœur couma ene la lumière ki fine apporte li ene la foi extra solide (ki pas capave bouger). Le Saint Prophète (saws) fine donne li la certitude ki so message li vrai et ki kan pou arrive sa grand jour là, le Jour du Jugement, le Saint Prophète (saws) pou attrape so la main, et pou dire li ki tout saki li ti dire li lor la terre ti la vérité. Sa phrase ti considéré comme étant pli lourd ki la terre et lé ciel. Après tout, sa pas ti ene phrase de n'importe qui, mais sa ti ene phrase ki sorti de la bouche sacré du Saint Prophète (saws). Le poids de sa phrase là fine faire li vine croyant.

C'est ene l'exemple ki montrer nous bane liens solides entre le Saint Prophète (saws) et so papa adoptif. Si tel ti so comportement envers so papa adoptif, alors

maginer afaire ki kalité traitement li ti pou faire pou so papa biologique, si li ti encore en vie ? Bien ki so papa adoptif ti dans le mauvais chemin, li pas ti croyant, mais le bon comportement du Saint Prophète (saws) envers li fine conduire li dans le bon chemin.

LE DEVOIR D'ENE GARÇON

Sa c'est ene zoli l'exemple ki bizin applicable à la société actuelle. Le devoir d'ene garçon c'est pou réussi guide et amène so papa dans le bon chemin, si arriver papa là plonger dans le 'Shirk' ou bane les autres péchés. Ene grand récompense pé attane sa garçon ki réussi faire so papa gagne la foi, et faire li sorti de l'obscurité.

Kan li fine éclairer avec la lumière de la foi, la réaction de Hazrat Harith (ra) ti alor faire so poids, tellement li précieux. Le Saint Prophète (saws) fine contigner dire li ki le Jour du Jugement, li pou dire so papa adoptif ki li pas pou largue so la main tanque ki papa là pas rentre dans paradis. Et alor sa amène nous pou réfléchi lor sa parole là: **Iman (la foi) c'est Aqeedah (la croyance)**. Le Saint Prophète (saws) fine donne li le moyen pou rentre dans paradis tout en attrapant so la main.

La société actuelle bizin prend l'exemple lor sa bane liens parent-enfant là, et alors, pou népli ena l'obscurité. Pas pou ena place pour le 'Shirk' et nous pou gagne ene société saine et paisible kot li pou bon pou vivre. C'est le devoir d'ene garçon (ou même ene tiffille aussi) pou ramène so papa dans le droit chemin et vice-versa, au cas garçon (ou tiffille) là ti dans mauvais chemin.

Bane *Sahabas*, *Taabe-in*, *Swaleheen*, *Arifeen*, *Muttaqeen*, et bane les autres dimounes pieux, sans oublier bane Mujaddids ki ti vine après li (Hazrat Muhammad (saws)), et ainsi ki le Messie Promis Hazrat Mirza Ghulam Ahmad (as), zot tous ti prend en considération sa message là. Parmi bane Mujaddids avant l'avènement du Messie Promis (as), ti ena Hazrat Abdul Qadir Jilani (as) ki ti l'excellent maître et guide de so l'époque. Li ti marié à quatre reprises et li ti ena 49 zenfants (garçons et tiffilles) et la relation entre papa et zenfants ti bien soudée, cordiale et exemplaire. Et quant à bane zenfants du Messie Promis (as), zot tous ti pieux, et parmi ti ena ene - le fils et réformateur promis - ki ti apporte félicité et prospérité à so l'honneur et mission; ene héritage biologique et spirituel.

Donc, c'est le devoir d'ene garçon pou bien occupe so papa et vice-versa. Ene bon papa faire la plupart du temps bane bons zenfants et bane bons zenfants zot faire l'honneur et émerveille zot papa et zot donne sa papa là l'espoir et même papa là (si arriver si ti dans mauvais chemin) arriver capave réformer, kot sa faire Allah (twa) grand plaisir.

Ki Allah envoye So bane bénédictions et faveurs multiples lor nous chef et maître Muhammad (saws) et so bane papa bien-aimés (Abdullah et Harith) et ainsi ki lor tous bane dimounes ki ti très chers à li et ki ti bane croyants sincères dans so Message ki li fine apporter. Ki Allah compte nous aussi parmi so bane suivants sincères et ki nous suive toujours so l'exemple parfait tout au long de nous la vie lor la terre. *Insha-Allah, Ameen.*